



ATASSUT
Steen Lyngé

UPA15/61-1
25.03.2015.

Inatsisartut aalajangiiffigisassaattut siunnersuut Naalakkersuisut peqquneqassasut inuusuttunut timersornikkut piginnaasaqarluartut eqqarsaatigalugit timersornermik ingerlatsinerup saniatigut ilinniakkamik ingerlatsinnaanissaat eqqarsaatigalugu timersornermut højskolemik pilersitsisinaanermut periarfissanik misissueqqullugit.

(Inatsisartunut ilaasortat, Siverth K. Heilmann aamma Steen Lyngé, Atassut)

Timersornermut højskolemik pilersitsisinaanermut misissueqqullugit Naalakkersuisut peqquneqarnissaannik siunnersuutitsinnut tunngatillugu ATASSUT-mit imatut oqaaseqaateqassaagut:

Siullermik Naalakkersuisut nersualaassavagut inuusuttut ilinniarfiini misiliutigalugu timersornermik sammisumik ilinniagaqarsinnaanermik periarfissaqartitsilermata. Taamaattorli matumani misissortikkumasarput inuusuttunut, assigiinngitsunik pissuteqartumik ilinniakkamik suli aallartitsisimannngitsunut sammitinneqarpoq.

ATASSUT-mit erseqqissassavarput Piareersarfiit inuusuttunut ilinniagaqalernissamut atuagarsornikkut allatigullu piareersarnissamut periarfissiinerat akuersaaraluarlutigu ataqqigaluarlutigulu, taamaattoq suli isumaqarpugut inuusuttut timersornermik sammivilimmik højskolersinnaanissaannik periarfissiinissaq pisariaqartoq.

Inuiaqatigiit ilinniarsimassutsikkut qaffassarneqarnissaat tamatta kissaatigaarput, taamaattorli aamma piviusoq avaqqussinnaanngisarput tassaavoq, inuusuttut tamaasa piunaffigisinnaannginnatsigit atuagarsorlutik ilinniagaqalissasut, inuusuttoqartuaannassaaq atuagarsornermik aallusserusunngitsunik, assassornermilli aallaavilimmik ilinniagaqalernissaminnik kissaateqartunik, taakku aamma ilinnialernissaminnut piareersarnerminni timersornikkut piginnaasaminnik aallussiutigalutik ingelatsisinnaanissaat periarfissaasariaqarpoq.



ATASSUT INATSIARTUNI

Oqareernitsitut inuusuttut timersornermik aallutaqartut ilinniarnerminnut atatillugu immikkut samminnisinnaanissaannut periarfissaqartitsisoqarnissaanik Naalakkersuisut sulissuteqarnerat iluarisimaarparput, neriuutigarpulli inuusuttut ilinniagavimmik aallartitsinnginnerminni piareersarnerminnut atatillugu timersornermik sammivilimmik nunatsinni højskolersinnaalissasut.

Isumaqarluinnarpugut højskolemik taamaattumik nunatsinni pilersitsisoqarpat inuusuttut akornanni højskolernissamut soqutiginninneq annertussasoq. Taamaattumik neriuutigarpurput siunnersuuterput ilassilluarneqassasoq.

Taamatut oqaaseqaateqarluta inassutigissavarput siunnersuut akuersaartumik suliarineqassasoq aappassaaneerneqartinnagulu Inatsisartut Kultureqarnermut Ataatsimiititaliaanni suliarineqassasoq.